

Krusifikashon

Ehekushon pa sierto krímen ta komún rònt mundu. Hopi pais ta opta pa un forma di ehékushon ku ta sin doló i rápido, òf sikiera e kriminal ta pèrdè tinu mes ora. Por ehèmpel, ku palu di horka, ora e kurpa ta kai, e kabuya ta kibra garganta di e víktima, e ta bai for di dje mes ora, i ta muri algun minüt despues. Desde 1792, Fransia ta usa guiotine pa kap kabes di e prisionero. Vários nashon ta tira e akusado mata. Otro pais ta mara e kondenado den un stul konektá waya na su kabes i pia anto manda koriente dor di su kurpa. Un otro forma di ehékushon ta e kamber di gas. Despues di mara e malechor den un stul, dos kímiko mesklá ku otro ta produsí un gas venenoso ku ta pone e kriminal pèrdè tinu mes ora anto muri dentro di sinku minüt. E inyèkshon di veneno ta pone e pèrsona pega soño inmediatamente, i despues e ta muri.

Den pasado, maske algun forma di ehékushon tabata mas humanitario ku otro, morto inmediato i sin doló no tabata e meta. Kimamentu na staka tabata komun. Prisoneronan romano a ser matá dor di kap kabes ku spada. Antes, hopi pais oropeco a ehékutá dor di hoga e akusado. Hudiunan a bati e malechor ku piedra te ora el a muri. Algun siglo pasá, Spaña i Portugal a pone un "garrote," un kòl di heru rònt di garganta dje víktima, anto skruf e sera te ku e pèrsona a sofoká.

Siglonan pasá, e pèrsonan òf fenisianan a inventá un forma di ehékushon ku tabatin krueldat komo meta. Tabata nan intenshon pa e kriminal sufri hopi sin pèrdè tinu miéntras e ta muri poko poko. E romanonan a adoptá e sistema aki, ma a reserv'é solamente pa katibunan i kriminalnan; e krueldat aki tabata muchu horibel pa un suidadano romano. Kiko tabata e método aki? Krusifikashon.

Promé ku nan a krusifiká un víktima, nan tabata sut'é ku un zuip di kueru, ku tabatin pidanan di metal i wesu na su puntanan. No tabatin límite kuantu sóta e kriminal por haña. E sota tabata asina horibel ku lomba di e pèrsona a keda tur na herida hundu sangriento doloroso. Tin ora e sota mes tabata mat'é.

Despues e malechor tabata obligá pa karga e balki horizontal te e lugá di krusifikashon. E palu vèrtikal tabat'ei kaba. Ora e akusado a yega, nan tabata kita su paña, klaba i kisas mara su mannan na e balki ku el a karga, his'é i mara of klaba e balki horizontal na esun pará, i klaba su pianan.

Nòrmal e prisionero no a muri pa dos te tres día. Kada rosea tabata penoso, kada moveshon a kousa doló insoportabel. E kondenado a mareá, a sinti kramp, sinti hamber intenso, no por drumi, keintura pisá, bèrgwensa. Su heridanan habrí a morde i a ser infektá. Ardunan a hincha. Ku kada ora e horror a intensifiká.

Awendia e instrumènt kruel di ehékushon aki ta dòrna misa paden i pafó, kas i kantor, ta bistí na kadena òf renchi di orea. Pakiko ta krus, i no un forma di ehékushon mas humanitario? Pakiko nos no ta bisti un guiotine òf palu di horka? Pasobra Hesu-Kristo a muri na un krus, demonstrando Dios Su amor pa nos

Nos tur ta pekador: nos ta gaña, rabia, evidiá, hòrta, èts. Bo piká, maske kon chikitu bo ta haña ku e ta, ta un ofensa grandi kontra Dios santu. Siendo hustu, E mester kastigá bo pa bo piká. Bo no por satesfasé Dios Su rabia hustu kontra bo piká maske kuantu bon obra bo ta hasi òf kon deboto bo ta.

Ma Hesus a ofresé pa ser kastigá na bo lugá. Riba krus, Dios Tata a kastigá Dios Yu, Esun ku nunca a hasi piká, na bo lugá, i awor ta ofresé pordon na bo!

Ma ta keda na bo. Bo por realisá ku bo piká ta meresé Dios Su kastigu etèrno. Bo por kere ku Hesus a tuma e kastigu ku bo meresé. Ma esei no ta skapábo di kastigu etèrno. Bo mester tuma un desishon konsiente pa aseptá e pordon ku Dios ta ofresé dor di Hesus. "Esun ku kere den e Yu, tin bida etèrno, ma esun ku desobedesé e Yu, esei lo no mira e bida, ma e rabia di Dios lo keda riba dje" (Juan 3:36). Beibel su pregunta retórikò ta apropiá: "Kon nos lo por skapa si nos neglighá un salbashon tantu grandi asina?" (Hebreonan 2:3).

E krus ta un símbolo presioso! Ma maske bo ta bisti krus òf ta bishitá un misa dorná ku krus, si bo ta nenga di tuma e desishon aki, kastigu etèrno pa bo piká ta wardábo, pasobra bo ta rechasá Hesus Su sufrimentu na bo lugá riba krus